

呂  
子  
評  
語

呂子評語正編略例

朱子而後學朱子之學。心朱子之心。而氣魄力量又奮庭以發。揮朱子傳註遺書之蘊者。晚村呂先生一人而已。今特錄之。曰呂子尊呂所以尊朱也。

宋末元明以來。儒者守朱子家法。闕邪崇正。代不乏人。大槩見粗力小。不足與斯道之傳。故亦無以撲異端之燄。杯水車薪。滅乃益熾。一經呂子辭闢。便如日月之出。燭火不復有其光。山岷海滋。聞呂子之說者。莫不感發興起。宇內得再覩一番經正。此是何等力量。

呂子之說。大約散見於時文評語。評文寔皆所以明道。則集呂子之說者。卽謂之評語可。舊本以語錄講義爲名。不知語錄乃門弟子記錄其師之詞。講義當自成一書。或自成一首。呂

子自云生平未嘗開堂說法。則知本無講義流傳。而評語出呂子手筆。初非門弟子記錄語也。此等名目。固已不得其寔。甚至有無限要義。拘於語錄講義之名。槩從節去。學者不能無憾。故不得不另爲編集。

是非二字。不知世間必欲含糊過去。是何肺腸。是非不明於人心。此邪說之所以橫流。江河之所以不返也。呂子之說。只不肯含糊。是非不肯含糊。是非只爲要正人心。人心正。則邪說者不得作。故嘗論評語之功在人心。直與孟子好辨等。不是尋常事業。附錄明云先生非選家也。偶評非時書也。先生之言間托於是爾。今必曰選家。且妄推曰選家高手。呂子所以屢歎不幸其形迹似之也。

呂子評刻時文。不過借爲致其說於天下之具耳。認煞便不是。

究竟道理通塞通滿無往不是時文亦卽其發見之一端批摘點勘只是此理言借尚看成兩橛也。

呂子評文正呂子知言處我輩閱呂子所評之文卽我輩窮理處胸中眼中總可不存時文見識也。知此意者可與讀呂子評語並可與讀呂子所評之時文。

呂子是以評文發揮道理其就題論題就文論文針鋒各有對處如題係一節兩節一句半句上下截斷牽搭移步換形其文各有結撰而評亦因之以立論更有因文感發推論時或不盡爲本文本旨所有然融而會之無不互相發明我輩讀書本只求此理之明時下講章越細密越支離儒先議論越開濶越通暢此意非俗學所知也。

讀是編者須知每條前自有時文在而此爲評語其議論推廓

處本不得槩以字箋句釋之義例求之。要使呂子就書作傳註。又另有說。然道理總無二也。

此編自成呂子明道救時之書。與從來講章本頭絲毫不相比附。時下動將呂子之說。夾和蒙存等說數一例編纂混看。此種冤苦。直是無處申訴。

時講惑亂益深。俗學蔽鋼益甚。凡一切拘文牽義。破碎支離之解。從前無不誤中蠱毒。直當徹底吐瀉一空。方可與領是編之奧。否則胸腹有宿痞。喉間早已壅滯。雖排列珍異。強之使食。豈能適口下咽乎。

孟子謂仁人心也。說得是。程朱謂人之心未便是仁。心之德方是仁。呂子謂單說心。卽本心之學。非聖學也。又說得是。告子謂生之謂性。說得不是。明道亦謂生之謂性。却說得是。荀卿

謂性惡說得不是明道謂惡亦不可不謂之性却又說得是異者不異同者不同此間總須解人強聒不得。

程朱直接孔孟。呂子而外。敢道無人真信得及。無論假竊孔孟。非毀程朱者。直是異教兒孫。吾道孟賊。卽自負爲尊信程朱者。亦僅以爲程朱者。孔孟之功臣。由程朱可漸至孔孟。論未嘗不當理。而語實出於隨聲。微窺其胸中。便有老大信不及。畢竟勉強帶三分周旋。世情在。展轉遷流。終歸異學俗學。皆此一點勉強。周旋處爲之伏根。試看呂子評語中。孔孟程朱連稱並舉。夾縫不必更著一字。總由其本領印合。洞然無疑。寔見得前聖後聖。道脉心原。揆同致一。其間縱不無些子屑級。總非境地隔絕。遼遠者所得。妄加擬議評騭也。時下貴遠賤近。輕置低昂。都是無知耳食人。門外猜疑。影響夢話。名爲

尊信其實去背畔者無幾。凡此等只在見地上爭高下。所見不真。不但不能尊信程朱。卽孔孟亦何嘗受汝曹尊信來。

竊嘗謂四書之後。當續以小學近思錄。更集朱子語爲一書。與四書而七。使萬世學者首先誦習。痛下工夫。打定盤針。而後徐及諸經史。庶不至躐却路頭。閱向來編朱子語者。如蔡覺軒續近思錄。葉雲叟語錄類要。丘瓊山學的高景逸節要諸本。皆有未安。而呂子晚年欲成此書。未及而歿。徒爲千古恨事。今於呂子評語一編。亦願與當世學者重加商訂。一體先行誦習。否則盤針不定。雖窮經而博考註疏。讀史而橫生論斷。到底都成錯鐫。求一言之幾於道而不可得也。

呂子趁快說去。亦間於章句集註小有出入。然枝葉之失。總無傷於其大本之同也。

程子曰。學者全要識時。不識時。不足以言學。呂子所下之藥。多是薑桂大黃。時症不同故也。然每以此撓衆喙。滋羣疑甚矣。此事之難言。

孔父談仁義。期其萬一回。聾者自不與。豈能廢神雷。東海老腐儒。歌哭出蒿萊。其樂有餘樂。其哀有餘哀。噫嘻。呂子固不得已耳。

朱子文集語類中有問目極長。而答止一二語一二字者。無不收錄。祇欲由此得理之是非耳。此編兼載時文及他評者。卽以時文他評常問目也。

文仍其姓名。評仍其字甫。或卽仍其書名。總不欲掩是非之由。以便查考。

間有數條合爲一條者。取其意義貫通。彼此相足。庶不失呂子



之意。非敢妄爲比附也。

首大學。次論孟。次中庸。此朱子讀法次第也。今遵之。

呂子評語。研窮精微。辨析同異。其於書義文法。皆歸斯理不易之極則。雖若條分縷析。其實同出一源。不可分而爲二者也。但編次雜和。不便觀覽。今以發明書義者編正。其論文則別爲餘編。一並付梓。庶學者得覩評語之全。

慙書三十首。以理則透宗。以文則絕頂。正呂子所謂道所生之文也。今亦附載各章之末。若謂必守溪鶴灘而後爲經義正則。則余不敢知矣。

余之爲此編也。恐其評本久久磨滅。不得已而出此。固不能盡得呂子之意。且收拾雖云略備。而遺漏終復不免。呂子評本未至磨滅。正須尋求。此編不過爲窮鄉晚進無力全購者地。

非謂有此可廢評本。亦非導人以簡便也。

此編自壬辰迄乙未。繙閱反復。中間以事作輟。凡四年而成。胡君虹山。與余季弟須上。更互商訂。又幾一載。同已章分節次。黑白瞭然。若呂子生平評文公案。則卷首數篇。自道已盡。而此編之指要亦明。故不敢復以己意輕爲之序。懼褻也。

康熙丙申仲春晚間軒主人車鼎豐謹識

呂子評語正編目錄

卷首

纂錄文集十三條

卷之一

大學經一章

卷之二

大學傳首章至傳七章

卷之三

大學傳八章至傳十章

卷之四

論語學而第一

卷之五

論語爲政第二

卷之六

論語八佾第三

卷之七

論語里仁第四

卷之八

論語公冶長第五

卷之九

論語雍也第六

卷之十

論語述而第七

卷之十一

論語泰伯第八

卷之十二

論語子罕第九

卷之十三

論語鄉黨第十

卷之十四

論語先進第十一

卷之十五

論語顏淵第十二

卷之十六

論語子路第十三

卷之十七

論語憲問第十四

卷之十八

論語衛靈公第十五

卷之十九

論語季氏第十六

卷之二十

論語陽貨第十七

卷之二十一

論語微子第十八

卷之二十二

論語子張第十九

卷之二十三

論語堯曰第二十

卷之二十四

孟子梁惠王上

卷之二十五

孟子梁惠王下

卷之二十六

孟子公孫丑上

卷之二十七

孟子公孫丑下

卷之二十八

孟子滕文公上

卷之二十九

孟子滕文公下

卷之三十

孟子離婁上

卷之三十一

孟子離婁下

卷之三十二

孟子萬章上

卷之三十三

孟子萬章下

卷之三十四

孟子告子上

卷之三十五



孟子告子下

卷之三十六

孟子盡心上

卷之三十七

孟子盡心下

卷之三十八

中庸第一章至第十一章

卷之三十九

中庸第十二章至第十六章

卷之四十

中庸第十七章至第二十章

卷之四十一

中庸第二十一章至第二十六章

卷之四十二

中庸第二十七章至第三十三章

內附懸書三十首

外附親炙錄八十九條

呂子評語正編目錄終

呂子評語正編卷首

程子曰。今之學有三。而異端不與焉。一訓詁。一文章。一儒者。余按  
今不特儒者絕於天下。卽文章訓詁。皆不可名學。獨存者異端  
耳。昔所謂文章。蘓王之類也。訓詁。則鄭孔之類也。今有其人乎。  
故曰不可名學也。而有自附於訓詁者。則講章是也。儒者正學。  
自朱子沒。勉齋漢卿僅足自守。不能發皇恢張。再傳盡失其旨。  
如何王全許之徒。皆潛畔師說。不止吳澄一人也。自是講章之  
派。日繁月盛。而儒者之學。遂亡。惟異端與講章。畸互勝負而已。  
異端之徒。遂指講章爲程朱。而所爲儒者。亦自以爲吾儒之學。  
不過如此。語雖夸大。意實疑餒。故講章諸名宿。其晚年皆歸於  
禪學。然則講章者。實異端之涉廣。爲彼驅除難耳。故曰獨存異  
端也。永樂間纂修四書大全。一時學者。爲靖難殺戮殆盡。僅存

胡廣楊榮等苟且庸鄙之夫主其事。故所摭掇多與傳註相繆戾。甚有非朱子語而誣入之者。蓋襲通義之誤而莫知正也。自餘蒙引存疑淺說諸書紛然雜出。拘牽附會。破碎支離。其得者無以逾乎訓詁之精。其失者益以滋後世之惑。上無以承程朱之餘緒。下適足爲異端之所笑非。此余謂講章之說不息。孔孟之道不著也。腐爛陳陳。人心厭惡。良知家挾異端之術。窺羣情之所欲流。起而決其籬樊。聰明向上之士。喜其立論之高。而自悔其舊說之陋。無不翕然歸之。隆萬以後。遂以背攻朱註爲事。而禍害有不忍言者。識者歸咎於禪學。而不知致禪學者之爲講章也。近來坊間盛行本子。淺陋更甚。又有增改各刻。愈出愈謬。然且家佔戶畢。取其簡便穢惡既極。勢不得不變。變則必將復出於異端。此有心吾道者之所深憂而疾首也。朱子教人但

涵泳白文有未得而後看本註。看註未得而後看或問。今當依之爲法。以本註爲主。無論新舊講章。一切勿泥。卽大全中亦但看程朱之言。其餘諸儒合於註者取之。否則闕之。如此則進可東皐續選附錄以求儒者之學。退亦不失爲古之訓詁。或庶乎其可也。此理之不明。又數百年矣。毒鼓妖幢。潛奪程朱之坐。以煽惑天下也。又久矣。此又孟子以後聖學未有之烈禍也。生心害事。至於此極。誰爲厲階。不知所屆。此凡有血氣所當共任之責。况於中讀書識字。又頗知理義者耶。某竊不揣。謂救正之道。必從朱子。求朱子之學。必於近思錄始。又竊謂朱子於先儒所定聖人例內。的是頭等聖人。不落第二等。又竊謂凡朱子之書。有大醇而無小疵。當篤信死守。而不可妄置疑鑿於其間。此數端者。自幼抱之。惟姊丈聲始頗奇其神合。故某喜從之論說。餘皆不之信。

也。昔聲始謂目中於此事躬行寔得。只老兄一人。於時已知嚮往。旋以失脚俗塵。無途請益。於今雖知覺未盡泯滅。而於小學入手工夫。未嘗從事。直無一言一動之是。此病不是小小。平生言距陽明。却正坐陽明之病。以是急欲求軒岐醫治耳。

與張考大

某南邨之鄙人也。至愚極陋。未嘗學問。幼讀朱子集註而篤信之。因朱子而知信周程。因程朱而知信孔孟。故與友人言。必舉朱子爲斷。友人遂謬以爲好理學者。其實未嘗有所聞也。足下書云。篤於信孔孟。故深於疑程朱。某則不然。竊恐於孔孟未必篤信耳。果篤信孔孟。則未有更疑程朱者。若疑程朱之不合於孔孟。某將謂從孟子便應疑却。孔門但言仁。孟子則言仁義。孔子言性相近。孟子則言性善。可疑也。且不止此。將謂從孔子便應疑却。孔門問仁。孔子答之。彼此異詞。無一言之同。又何從得所

謂一定之論。明聖賢之指趣。爲後學之宗依耶。如此則直合疑殺東坡所云疑。漢不曾有揚子雲也。足下書又云。宋賢之所謂理。卽老莊之所謂道。且未說程朱。卽老莊二公。亦未肯心服。在無怪乎觸處皆疑也。嘗聞之矣。言不難擇。而理未易明。必於古人之書。反復翫味。寬心游意。使其所說。如出於吾之所爲。無復纖芥之疑。而後發言立論。辨其可否。不則理有未明。於人之言。有未能盡其意者。豈可遽細古人。而直任胸臆之所裁乎。某之所聞於朱子者如此。若兩書中云云。某學識卑闇。實不能辨也。

答潘用微

道之不明也。幾五百年矣。正嘉以來。邪說橫流。生心害政。至於陸沉。此生民禍亂之原。非僅爭儒林之門戶也。手教謂陸派沸揚。朱學湮塞。從陸者易。從朱者難。足盡末流波蕩之失。某竊惟其

故亦由從來尊信朱子者徒以其名而不得其真而近世闢揚  
陸說者其權詐又出金溪之上金溪之謬得朱子之辭闢是非  
已定特後人未之讀而思耳若姚江良知之言竊佛氏機鋒作  
用之緒餘乘吾道無人任其惑亂夷考其生平恣肆陰譎不可  
究詰比之子靜之八字著脚又不可同年而語矣姚江之罪烈  
於金溪而紫陽之學自吳許以下已失其傳不足爲法今日闢  
邪當先正姚江之非而欲正姚江之非當真得紫陽之是論語  
富與貴章先儒謂必取舍明而後存養密今示學者似當從出  
處去就辭受交接處畫定界限札定脚跟而後講致知主敬工  
夫乃足破良知之點術窮陸派之狐禪率臆妄議自知粗狂無  
當於理惟先生不棄其愚而教正之幸甚

復高  
彙旃

王學之惑亂幾二百年其間大人先生亦頗知其謬然大約指摘



其弊病者輕而許與其具體者重甚則與朱子兩分其是非。知其於邪正之間。蓋猶有所未確矣。讀貴師質疑所論。剖決精詳。絕無包羅夾帶。自羅整菴陳清濶徐養齋以來。未有如是之親切著明者。此誠斯道之幸。生民之幸。非小小文字之功也。傾弟更有所進者。近世王學惑亂。雖未能廓如。然猶多疑而辨之。至於陳獻章一宗。幻妄充塞。如謂意爲心所存。慎獨有獨體。一貫爲入門工夫。而非究竟其背畔。程朱爲尤甚。然不幸其淵源誤出於前輩正人之口。遂足以鼓動流俗。不審張先生亦嘗聞其訛而辭闢之乎。此宇宙生心害政之大患。有心者不可不力持而救正之也。

與吳容大

聖道在兩間。雖千年無人。任異端所惑亂。而未嘗澌滅也。今日疑果澌滅矣。忽於澌滅中得先生之言。又有一某千里不相約而

合先生之言。此何由乎。卽所爲漸滅不得也。是以君子不必爲道憂。而亟爲自憂。憂之必辨之。辨之必極其至而後已。豈過求以爭勝。立異以爲高哉。不如是不能定是非之歸。而實得之於已耳。故得彼之所爲非。而益信此之是一辨也。真得此之所爲是。而後能盡彼之非。又一辨也。讀先生甲寅所示正王諸文。於彼說之非。旣洞抉無餘矣。某復何以進。無已。則商吾之是者可乎。夫所非爲王。則所是爲朱。可知也。按朱子平生所嚴闢者三焉。一金溪。一永康。一眉州也。金溪之爲姚江。不必言。若永康之功利。眉州之權術。兼挾文章之奇。尤足以病學士大夫之疾。故朱子闢之甚厲。果以朱子爲是乎。宜於此擇之精。語之詳矣。今讀後寄街南諸作。於義例似未嚴也。且議論往往出入永康眉州間。毋亦朱子謂賢如吾伯恭。亦尚安於習熟。不甚以爲非者。

乎。倘於此有纖毫之疑。卽於所是有未的。則所非雖甚辨。尚須勘驗也。自古有道所生之文。有因文見道之文。如退之永叔。因文見道者。先儒猶少之。以其有所明。亦有所蔽。不足定是非之歸也。故學者多患不能文。能文者又患不純乎道。又必有韓歐其人。生程朱之後。實得其道於已。一開斯域焉。度其文必韓歐有未之及者。而惜未之見也。先生幾之矣。可仍爲未見程朱之韓歐哉。狂迂之言。似無端而可怪。然譬之舶賈泛大海。遇颶濤羣以盤鍼致戒於舵師。非其伎嫻於舵師也。衆賈之命存焉爾。某且托命於先生矣。故不揣固陋。以求正於左右。其或未然。藉以發鍼石之施。尤某之深幸也。

答吳雨若下同

前者正王之教。似以某有一知半見之仰同。足與共論者。今茲惠示。旨述則又似憫其知見之陋。而欲以所得廣之者。天下芸芸。

幾人理會斯事。其高座說法者。勢又不可復受商量。如老兄之擔荷大業。而垂詢不倦。誠世俗之所稀。某何幸而得此於老兄也。然某之忝頑僻固。寔有所不可廣。亦不敢曲附爲同者。不敢不明告。而冀垂亮焉。某生平無他識。自初讀書。卽篤信朱子之說。至於今。老而病。且將死矣。終不敢有毫髮之疑。眞所謂賓賓然守一先生之言者也。今教之曰。爲講義制舉文字。則常從朱而辨理道之是非。闡于聖之絕學。則姑舍是。夫講章制藝。世間最腐爛不堪之具也。而謂朱子之道。僅足爲此。則亦可爲賤之至。惡之至矣。此某之所未敢安也。夫朱子章句集註。正所以辨理道是非。闡于聖絕學。原未嘗爲講章制藝而設。卽定制經訓。從朱子。亦謂其道不可易。學者當以是爲歸耳。豈徒欲其尊令甲取科第已耶。况某村野廢人。久無場屋之責。其有所評論。亦

初非爲制舉文字當爾也。今指某尊朱以攻王爲制舉家資則其不然又甚矣。果僅爲制舉家資云爾則王何必攻王非令甲所禁也。且某尊朱固有之。攻王則未也。凡天下辨理道闢絕學而有一不合於朱子者則不惜辭而闢之耳。蓋不獨一王學也。王其尤著者爾。昔者孔子之道雖大然當戰國時楊墨老莊儀衍輩出天下幾無孔子矣。賓賓然守一孔子之言者孟子耳。今天下知尊孔子而不敢非此非今天下之明孟子之力也。然孟子之言歷于餘年猶少信之者。以宋司馬溫公之賢猶疑且詆之他可知矣。及南宋朱子出賓賓然守一孟子之言然後孔子之道乃益著。今日老兄與某得以尊信孔子之道者由孟子也。而得尊信孟子以及孔子者由朱子也。故某之尊信朱子也又親於孔孟。今教之曰奚爲賓賓然守一朱子之言則孔孟先危

矣。奚有於朱子。陽明不云乎。道天下之公道。學天下之公學。非朱子可得私。非孔子可得私也。求之於心而是也。雖言之出於庸人。不敢非也。而況出孔子乎。求之於心而非也。雖言出孔子。不敢以爲是也。而況未及孔子者乎。今尊書之旨。毋亦猶是。而且闢王學爲內篡。告子爲內畔。佛老爲外寇。不知所云云者。爲內篡與。內畔與。外寇與。吾恐老兄之於王學。猶未盡其說。且有陰墮彼中而不自覺者矣。夫陳獻章王守仁。皆朱子之罪人。孔孟之賊也。今特宗獻章後人之旨。而調斥守仁。是猶魏吳皆漢賊也。尊魏得漢統。而獨斥吳。宜非吳人之所服矣。況又奉魏以攻後漢乎。集中如意爲心所存。大學從古本。格物格本末。皆陳湛後人之所已言。是老兄固未嘗不賓賓然守一先生之言也。但其爲一先生者不同耳。由朱子而程子。而孟子。而孔子。此一

先生也由尊刻所述而湛若水而陳獻章亦一先生也則由陳獻章王守仁而陸九淵而達磨而告子亦一先生也凡此先生者宜何從則千古必有能辨之者矣蓋某之闢王說也正以其叛朱子而老兄之闢王也不必不叛朱子則某之闢王固不可仰爲同而某賓賓然守朱子之說有一不合卽以爲叛道而不敢從則尤非尊教之所欲廣矣老兄高明迴出不難駕越朱子而上度必有同得者與爲証合最下亦須與朱子等者而後能契服焉耳某方俯伏朱子門廡之下又安能知而敢與辨所說之是非哉所敬布左右者第以明己意不敢強爲附和而已

先生膺斯世斯文之望所居與遊論文講義流傳遠近在陶鑄中者不爲少矣某跼伏荒陬日趨彘固偶於時藝寄發狂言如病者之呻吟亦其病癢中自出之聲而賞音者以爲有當於歌謳

顧先生亦有取焉。又自慊然也。至謂痛抹陽明太過爲矯枉救弊。此則非某所知。平生於此事不能含糊者。只有是非二字。陽明以洪水猛獸比朱子。而以孟子自居。孟子是。則楊墨非。此無可中立者也。若謂陽明此言亦是矯枉救弊。則孟子云云。無非矯救。將楊墨告子皆得並轡於聖賢之路矣。且所論者道。非論人也。論人則可。節取恕收在陽明不無足法之善。論道必須直窮到底。不容包羅和會。一著含糊。卽是自見不的。無所用爭。亦無所用調停也。使陽明而是。則某爲邪說。固不得謂之太過。陽明而非。則某言猶有未盡者。而豈得謂之太過哉。從孔孟程朱必以明辨是非爲學。卽從陽明家言。渠亦直截痛快。直指朱子爲楊墨。未嘗少假含糊也。然則不極論是非之歸。而務以渾融存兩是。不特非孔孟程朱家法。卽陽明而在。亦以爲失其接機。



把柄矣。某所以寧犯不韙之名，而不敢以鵠突放過也。先生不

鄙其愚，伏望更有以垂誨之。幸甚。

與施思山下同

事理無大小，文字亦猶是也。有謂此與事理有別，與凡文字又有別。知其入於事理，文字都成斷港絕流，未有見處在。君平握粟尚可言忠孝，況本來此物，此志乎？論文正當共明此義也。

某衰病日深，暨事久已謝絕。惟點勘文字，則猶不能廢。平生所知解，惟此事。卽微聞程朱之墜緒，亦從此得之。故至今嗜好不衰。病中賴此摩挲，開卷有會，時一欣然，覺先聖賢一路目前歷歷。而正嘉以後，諸公講學紛紜，病謔夢囈，皆因輕看經義，不曾用得工夫。未免胡亂蹉却路頭耳。若謂弟逐蝸蠅生計，弟雖不肖，不至汗下如此。尊教殷殷愛我而賜之鞭策，敢不感激思奮。然於斯意尚多未達，又未免耿耿也。竊謂事理無大小，文義無

精粗莫不有聖人之道焉。但能篤信深思。不失聖人本領。卽擇之狂夫。察之邇言。皆能有得。如本領差却。則以曾子之慎獨。孟子之良知。未嘗不原本經傳。然適爲近世惑亂之鼓篋。路頭一蹉。雖日日靜坐。時時讀書。徒以佐其謬妄耳。病在小時上學。卽爲村師所誤。授以鄙悖之講章。則以爲章句傳註之說。不過如此。導以猥陋之時文。則以爲發揮理解與文字法度之妙。不過如此。凡所爲先儒之精義與古人之實學。初未有知。亦未嘗下火煨水磨之功。卽曰予旣已知之矣。老死不悟所學之非。鼠入牛角。蠅投紙牕。其自覩章句傳註文字之道。原無意味也已。而問外間有所謂講學者。其說頗與向所聞者不類。大旨多追尋向上。直指本心。恍疑此爲聖學之真傳。而向所聞者。果支離膠固而無用。則盡棄其學而學焉。一入其中。益厭薄章句傳註文

字不足爲而別求新得之解。不知正嘉以來諸講學先生亦正爲村師之講章時文所誤。不屑更於章句傳註文字研窮辨析。乃揣模一副謬妄淺陋之說以爲得之。不覺其自墮於邪異耳。故從來俗學與異學無不惡章句傳註文字者。而村師與講學先生其不能精通經義亦一也。蓋人聞邪異之解則必於章句傳註真有自信不及處要知此自信不及者乃吾心之粗非古說之失也。亦村師講章時文之所蔽。非章句傳註之本然也。篤信深思精其心以求之則其理自出。輕信粗心則必反疑古說。於是奮其私智穿鑿破碎思妄駕乎章句傳註之上。罪不勝贖矣。乃反謂經義必不可以講學。豈不悖哉。今日理學之惑亂未有不由此者。而其原則從輕看經義不信章句傳註焉始。此某之所以皇皇汲汲至死而不敢舍置也。

答葉靜遠

近世學者。患在直求上達。此總是好名務外。徒資口耳。於身心寔無所得。至目前紛紛。則又以之欺世盜名。取貨賄。營進取。更不足論也。要之真欲爲此學。須是立志得定。下手便做。不但求辨說之長。始得從上聖賢道理。已說得詳盡。又得程朱發揮辨決。已明白無疑。今人只是不肯依他做。故又別出新奇翻案耳。所謂至簡至當。豈有外於四書五經者。只是做時文人看去。只作時文用。爲詩古文者看去。只作詩古文用。若學道人看去。便句句是精微正當道理。更何經書之有哉。第程朱之要。必以小學近思錄二書爲本。從此入手。以求四書五經之指歸。於聖賢路脉。必無差處。若欲別求高妙之說。則非吾之所知矣。與柯或問於吳子自牧曰。吾聞晚邨之爲人也。佹佹涼涼。多否少唯。遇車蓋則疾走聞異音則掩耳而逃。與人言至科舉種子。未嘗不

痛疾而雪涕也。顧沾沾焉取時文批點之而吾子又爲之流布於天下。吾甚惑焉。吳子曰：予豈不知夫是書之過至於斯也。雖然，嘗聞之晚邨矣。讀書未必能窮理，然而望窮理必於讀書也。秀才未必能讀書，然而望讀書必於秀才也。識字未必能秀才，然而望秀才必於識字也。是則方其指偏旁描硃墨，便當以此事相責。又何間乎時文，而或曰：不然。逢年者以山林爲桎梏，避世者以軒冕爲塗炭，趨軌旣岐，器業斯別。晚邨獨不聞乎。吳子曰：是未知時文又烏乎知晚邨。昔者程子遇碑於途，有禪子同過焉，讀之曰：公看皆字也。某看皆理也。又語學者曰：某何嘗不教人習舉業，但於上而求必得之道，是惑也。今晚村所見爲論語、大學、中庸、孟子之理，而公且以爲文字，卽晚村所見爲文字者，而公又且以爲必得之道，其滋惑也不亦宜乎。如凡爲隱居

必當仇時文也將世舉孝弟力田則去父兄廬墓舉博學宏詞則焚經史典籍舉高蹈丘園不求聞達則蒼皇反復爲馬首之巢由而可哉晚村則以爲文字之壞生於人心而文字之善又足以正人心隱微深錮之疾其將廻魯陽之斜矐障支祁之潰浪經天行地一反其常固非一手一足之烈吾非斯人之徒與而誰與而且擎拳撐脚獨往獨來行路之人挨肩疊足而不顧咄嗟晚村其舍此識字秀才讀書者而安望耶東萊有云假試課以爲媒借逢掖以爲郵徧致於諸公長者之側其有豐獲焉或者不失晚村意乎猶以爲房書也選政也是蕭公之崇佛達磨以爲毫無功德者也

大題  
代序

先生非選家也偶評非時書也先生之言問托於是爾先生之言也蓋詳天下有志之士由其言而得其所不言則是書爲已多

屢讀偶評而不入視不過時文而已則其於先生之言固終無得矣雖賣告奚爲乎故偶評止於此

補癸丑大題附錄

右纂錄文集十三條

呂子評語正編卷首終

呂子評語正編卷一

楚邵後學車鼎豐雙亭氏編次



大學

大學自程子更定復得朱子章句即使原本未必盡合正以精益精聖人復起不可易已後之學者未有能篤信而力行之故其效罕睹何嘗有從其說而得過者乎乃陽儒陰釋之徒惡格物之說害已彎弓反射輒以古文石經爲辭然理卒不可毀也其後索性敢道大學非聖人書嗚呼悖叛至此大亂之道也

大學經程朱考定如地平天成即與鴻荒時境界有不盡合分外分明停當萬世永賴後來紛紛動援古本石經狡焉思逞都是無知妄作耳如知本知先後之知與知止致知知字不同物有本末之物與格物物字不同而正嘉間講師皆比而同之至欲



以物有本末節補格致工夫傳文於字義且未通。遑論其學耶。故其人初以訓詁附程朱。而末年皆宗傳異端。蓋其所得乎程朱者原非也。然世儒方尊行其書。以爲說經之準繩。聖學安得不淆亂哉。

### 經一章

**黃淳耀文** 上古有治無亂。由其上下交修也。中古數百年而一治。由其綱維在上也。末世數千載而無一善治。由其教化不立。元元之民自爲賢不肖也。嗚呼。存則人。亡則書。聖經所爲作歟。教化不立。民自爲賢不肖。三代後大病在此。

### 首節

小學大學有地有制。如朱子序中所云八歲入小學十五入大學者是也。朱子序大學二字名目緣起。故云爾。其實此大學字却

指爲學之。乃古昔教人之法之義。故註云大人之學。其非地制之大學可知。須知王制大學中未嘗有此書。曾子推論大人爲學當如是。亦未嘗爲學宮補典故也。時文每因序語將大學闌入地制立說。迂混不切。

知有朱子小學之教在。大學之道四字纔分明。不則爲國學太學碑記失之矣。

**王庭文**今日者。異端紛起。各學其學。而非吾所謂學。將學有不明。未俗驚趨。各道其道。而非吾所謂道。將學之道有不正。急須標表其大云云。**評**此與中庸首節同旨。

除却俗學異學。卽是大學之道。俗學者。今之講章時文也。異學者。今之陽儒陰釋以講學者是也。

**歸有光**文自太先王之教不明於天下。而學者失其守也。而不知

人之立於天地之間。當求所以盡夫人之道。欲求所以盡夫人之道。當求所以盡大學之道。**評**讀大學者。遍地皆是。有一箇半箇見此意否。

**章世純**文其所以稱大者何。以及民故大也。如封已自私焉。小矣云云。**評**只這箇見識。便卑陋不可言。明明德止至善。皆爲民而設耶。如其文三綱領次第。當云在新民在明明德。在止於至善矣。秀才胸中。只見得做官做皇帝。便是盡頭天大事可笑也。

**陳子龍**文王化必本於內治。故人主不可以無學也云云。**評**人主以下奈何。聖經如許精義。一概拋置。只講皇帝家裏事。卽皇帝家事中。亦只講妻妾子女事。豈復成大學制義耶。

不論甚道理事物工夫。總要粘煞在帝王身上。以此爲大。總要歸本到權變作用。以此爲高。不知此正見其寒乞相也。

秀才不明理見陰符素書便信是王佐秘略與村儈談天書寶劍相似真可笑也

**黃淳耀**文聖經發爲己爲人之學評云成已成物則得爲人非聖學也兩樣夾雜不得

**歸有光**文聖經揭大人之學盡其心而已矣蓋明明德者存此心也新民者推此心也而止至善則又盡其心而無遺者也評大學無重心義以其本天也盡心只可當知至存心只可當正心不可以該明新也蓋心非卽明德心所具者乃明德耳單說心卽本心之學非聖學也

**又歸文**明德非吾心之體乎評明德兼身心性情合體用而言不止心體

**文南英**文語道而不要其至則隨其境之所造而遂自以爲足評

古今學術之弊只此

至善謂明明德新民各有極至之則止至善者如學聖必孔子而  
夷惠非所由治法必唐虞三代而五霸漢唐不足效之謂也

**歸有光**文止至善其成終之學乎**評**止至善兼始終不專終也

止至善之事只附在明新兩綱領上更無第三項用力處故止至  
善只說知不說行非止至善無行行卽在明新內也

止至善一綱領專重知故下文急接知止

知止而后有定節

凌渝安講聖經至此董采請曰八條目中知行並列此節單提重  
知一邊其意如何凌先生曰聖人預知天下後世講心性之學  
者必以學問思辨爲支離遺外而求內自立直截了當之法懸  
空想像一種道理若有所見原非真知其心自以爲定靜而愈

見猖狂故急於此單提知止爲入門下手之要。卽中庸告君誠身必先明善也。采舉似。先生曰。凌先生之言切矣。賢試道大學畢竟幾綱領。曰。章句以上三句爲三綱領。豈別有義乎。曰。吾正恐賢信不及有三綱領耳。以異端之旨言之。止有明明德一綱領耳。更無二事。安得有三。以俗學論之。已物對待。亦止兩綱領耳。何必有三。此兩家都信不及者也。不知後世學術之謬。正在此一綱領上差去。江西頓悟是知有明明德而不知明明德之有至善也。永嘉事功是知有新民而不知新民之有至善也。方知聖人於明新下急著此一綱領。吃緊爲人處。是聖學之定盤星。指南針。若少此一綱領。則上兩綱領都無根柢。然此一綱領至實却至虛。最難見。故最難信。上兩綱領知行並重。此一綱領却單重在知。至善只是難知。知得自然行得。行處只在上兩綱

領內不消更說。如孟子集大成章。聖是諸聖所同。集大成却歸孔子者。以其智更高耳。故知止一節。緊貼定第三句綱領說。有此一節。則此一綱領已了畢。以下八條目。只就上兩綱領中條析次第言之。雖止至善卽在其中。然却不是此一綱領註脚。故知行並列也。

此題文苦不切實。甚或混入邪說而不知者。皆因知止二字看不分明。離却至善而泛言止也。上面平列三綱領。然明新二件易見。而至善極難說。惟知之而後能得之。故正說止至善。接口卽下知止二字。若云必知止至善。自然定靜安慮而得止至善。以一止字總括止於至善四字。蓋急轉口省文也。後來講學者。先不通文理。如李見羅知止說。竟謂知止卽良止之止。無思無爲。復其寂然不動之本體。又謂知止卽知本。一派胡說。豈要借幾

箇儒家言語字眼。行其惑亂之術。全不顧經傳文義如何。故自隆萬以後。作此題者。無不墮入狂禪。總只是離却至善二字。此不特道理差。直是文理不通耳。

止字貼定至善。至善貼定明新。方是聖人之所謂止。懸空說止。未有不向和尚位下討活計矣。

**艾子**子止字深不得。却亦淺不得。**評**此便是混話。依千子作一篇。雖極細心。也定是夢呓耳。所謂止者。卽止於至善也。離至善單講止字。深不是。淺不是。不深不淺也不是。

止字貼定至善說。知字方不落空。

異端講止字。皆離却至善。故錯入禪去。然亦有不離至善講而愈錯者。如李見羅謂知止非懸空。知至善之所在而止之也。似矣。然他日對李慈。則曰。儒學與禪誠兩宗。禪與儒者之心無二體。



水非止何以能照。鑑非空何以能明。學可殊方。而心之必歸于止而能慮者一也。又涂邦直問近收拾一止。覺有進處。靜中一切皆如無有。如此去得無墮空虛近於禪。曰。還應得事否。曰。應處亦不差。曰。不論差不差。只一段清虛尚在否。曰。有時在。有時不在。曰。如此何慮墮空虛近于禪。觀此則不但其所謂止字懸空。連至善先懸空。其所以懸空者。緣他所謂至善。離却明新事理而言。卽在應事上講。亦只是要隨處尋求此一段清虛。便以爲止。便以爲至善耳。只看他不論差不差五字。其不識至善而的係狂禪。供狀昭然矣。聖經之所謂至善。正在明新事理上求。絲毫不差之極處耳。故予謂此節止字。必要靠實至善說。至善必要靠實明新說。方有著落。

明新各有至善。知得卽指止至善說。明新知得卽止至善在其中。

**歸有光**文知者所以明心見道而達其機者也。**評**見道上加明心下云達機便墮興趣。**評**大學之道固在於止至善以要天下之終尤必先於知止以開天下之始。**評**知止至善則自始至終步步不同豈待終而見其止乎。

**艾南英**文知止而後有定。可以一蹴至者也。由靜而安。由安而慮而後得其所止。此不可以一蹴至者也。**評**倒了。此節只完得止至善一句綱領。止至善原只在明新二綱領上說。如何又分出爲三緣。此一綱領最重。明新二綱領漸次工夫。卽止至善工夫如下八條目是也。而止至善一綱領之要。只在乎知一知卽自然定靜安慮而得。故朱子謂定靜安慮得五字是功效次第。不是功夫節目。非謂憑空了悟可得。言其功夫卽在八條目也。物格知至。則知所止矣。意誠以下。則皆得所止之序。章句煞自

分明所謂到慮而得。此處最難進。亦就五字功效中說到此地位較難。非將慮與知分兩節工夫也。若論功夫則全是物格知至。不可一蹴而至耳。今文謂知止有定。可一蹴而至。已先失其理。而謂定靜安慮不可一蹴而至。必待漸足自得。則是知止有定工夫輕。而定靜安又分出三節工夫。到慮又分出一節工夫。反以爲重矣。况其言知止有定。可一蹴而至。則所謂不可一蹴而至者。將在靜字分別工夫起乎。直謂之支離。不懂經義可也。知止統貫五者。五者各自相因。慮字次第較重。有字換能字。煞有意在此節無工夫。指定靜安慮言。不是連知止都無工夫。忽然摸著鼻子也。知止前正有後文致知工夫在。定主志向靜主心安主所處。慮主事得。字中包下文誠正修齊治平。一一有是義格物致知。是知止前工夫。意誠至天下平。是得止中次序。不知來

源去路縱說煞功效次第究竟不解何以不是工夫節目說知  
便似忽然大悟說得便似大事了畢名爲遵章句寔不知章句  
爲何語也

知止節註中字字實落非極精細人不能依註體貼蓋其中義理  
辨析甚賾粗心人不肯講究乃喜爲空玄籠侗之說似乎高妙  
若可解不可解不必有研窮詳審之功而坐踞顛頂誰復反而  
爲其難者此書理之終不可明而文日趨於妄也

五而后有層次義有不著層次義

纔知止五者相因而見知得相去不遠此大層級也五者逐段相  
因此大層級中小層級也定靜安相近至慮而得處較難進此  
小層級中重難層級也

凡人有一知一見自以爲是亦自會定然非知止至善之有定也

知止是說曉得極頭處不是識得箇路徑。

**歸有光**文念慮純一之後澄然者自有以涵天下之寂而淵默之地湛乎至虛至靈之體。此妙明也。非靜也。

**黃淳耀**文大抵一定而不能復動者異學也。而其弊寔生於求動之過早。異學無求動早之弊。到底動不得耳。暫定而不能長靜者俗學也。而其弊又生於求靜之過深。俗學也不知靜。靜不生於境而生於我。故境有寂感而御之者常一。靜不從知止之定講來。自然錯會。劉安有言。恬則縱之。迫則用之。其縱之若委衣。其用之若發機。可謂幾於道矣。曰。此老氏之道也。道其所道。非吾之道。此蜀山人董五經之類。終不爲程子所深取歟。陶菴崇禪而輕道。不知禪却從道偷來。○靜安分貼心身。慮字界微有不同。皆章句的旨。當時以叛註爲高。必無肯

依此說者獨陶菴毅然据之可謂狂流一柱矣及其疏析理要則仍受彼中法乳故知貌爲傳註之無當於學也

**陳際泰**

**云云**

**陽明**

而后能語氣一路追趕每句重言上一字

不重下一字**語**重上一字言固也然須總根知止來安字必須貼所處上看今都空說向心去顧麟士謂似首楞嚴未說可知當時名士名爲追尊傳註其定駁雜難與言正道也

定靜安慮得是知止後自然相因而見然五者之中慮字一節自別是臨事時研幾審處正是知止發用爲知得緊要關頭比上三事更重更難但慮之所以窮幽極微使事理盡處無不到則非安不能也

**黃濬**

**耀文**以爲天下有制心之事是道內以宗外而一物得以相

困矣若此者皆不安使之耳

**語**

上項病却自不知止中來不關

不安事。不安只是處事不能精詳耳。**文**辨析之精。至於一無疑義而後得此安。則人之所爲臨事而究圖者。業已精治之於先。事矣。**謝**慮字直從知止貫來。事理大段已在知止中明白。到此又研幾審處耳。

每見旁觀籌畫甚能。而當局多謬。迷舛錯者。只坐不安。非不能慮也。慮之義理已在知止中完徹。但臨事張皇。則思力憧擾。便不能精詳周匝。不是到此方去講究事物義理也。慮與知一原分界。須看得澄瑩。

能慮是臨事時見到慮處。比定靜安較重。

**歸有光**定靜安慮。心學相因之妙。一至於此。**謝**天也。性也。理也。道也。皆可以言學。心獨不可以言學。心者所以爲學之物。無以心爲學者。惟釋氏本心。以心爲盡頭。謂天性理道皆出其下。故

曰心學。凡言心學者皆釋氏之見也。況此三句兼身心事物在內。未嘗指心法而言。若謂身心事物皆心所爲。如此則四書無一章不可說是心學。又不止此節三句矣。

自知止至慮。只就知邊說。自誠正至治平。都是得止。

定靜安慮得。只一知止便到。雖一知止便到。然知與得兩邊境界却別。

得是得至善。人多混說。

### 物有本末節

此節總爲上文示箇下手次第。以起下二節。看近道二字。正對學者而言。

**羅萬藻**文道之不傳於天下。雖聖人不能傳也。故古人之所不得不詳者學耳。**認**異端道有別傳。聖人之學卽傳道。非道不能傳。



而傳學也。但道與學字須分明耳。

**孔自洙**文道之所在皆物也。學之所在皆事也。**註**道亦兼事物。學亦兼事物。不可分也。但物就理之自然說。事就人工當然說。在二字中分貼亦自有理。

至善不可名物。故但指明新而至善卽在本末中。本亦有終始。末亦有終始。聖人細細區分。正欲人會歸精一。後來要直截反成鶻突虛謬耳。

聖學愈分。則合處愈真。異端怕分。則所合亦僞而無用。

聖賢論理。必分晰精詳。惟分得愈細。則合處更真實。故曰惟精惟一。異端最怕分別。必捫掃一切。而後見本體。不知其所謂本體者。妄也。非真也。此是儒釋邪正分界處。後來陽儒陰釋者。又謂必先見本體。而後勘驗求盡於細分。其說似包羅可喜。然先約

而後博。先一而後精。與從來聖賢教人之法悖叛更甚。則又妄中之妄邪外之邪矣。

本末合來。方成一物。此中便有自然之序。

事非物外之事。

事物原不相離。

知先後知字。與知止致知兩知字不同。此處較輕。如云曉得个先後次第。則進爲有序。而入道不遠耳。所謂進爲者。卽下八條目。其中自有知行工夫格物致知。知也。誠意以往行也。與此知字不相蒙。講章以爲兼行說夢弊也。亦惑於姚江知行合一之說。故見知字便要兼行不通之論也。

此只說知得大段便有入門處。

知字在本節重。全章不重。本節重者。結上起下意在先後。然先後

工夫效驗之序。在下兩節。此只說知得先後便可近道。猶中庸知遠近云云。可與入德同也。全章不重者。知止知至兩知字相應。經意所重。與此知字不混。講章每將三知聯串。此不識字人論點畫爲類而不求意義者也。

近道二字。與章首相應。

古之欲明明德於天下者節

**歸有光**文。儒者功用之全。以一世民物爲己任。而明明德於天下。固其責之不容以自諉者。**薛**今人必以明明德於天下歸之帝王矣。此是何等見識。

修正誠致。各有工夫。各有功效。兩節就中分先後次第耳。工夫不無輕重。然無一可略。若但趕重下截。則節節推來。只一格物可了矣。下節而后亦然。

人言誠正致等不宜重做。恐侵傳地。余不謂然。經有經義。傳有傳義。必無聖經先爲賢者留地步而不說明之理。况傳文有詳有略。有獨有聯。有盡有未盡。不當以曾子之言反礙孔子也。

身與心較然有此二物。意卽心之所發。知卽心之所知。只在心中分別出來。爲用工節次耳。非又有二物與心並列而爲三也。欲修其身者六句。予最憎作者每云。心生於身而反以役身。心授權於意而意反以害心。意能蒙知而知足糾意。就其說譬之。身乃家常頑物也。心則主人也。意乃賊也。知則邏者校尉也。欲使主人合邏尉擊賊則得矣。試思一身之中。心意知三件。終日互相搏拏。厮鬧相似。有此大學否。

**彭瓏文**嘗論爲善爲惡者身之才。**評**非才之罪也。**文**無善無惡者心之體。**評**只此句是異學源頭。**文**有善有惡者意之用。辨善辨

惡者知之良。評用字亦不妥。文古大人端躬建極。其欲修非不  
亟。而無爲守正。早存於慎。修思永之先。豈無見於形神相宰。而  
爲是主靜之切切乎。評周子主靜指理言。若白沙則直是禪耳。  
語一而意不同。文古大人洗心藏密。其欲正非不虔。而閑邪存  
誠。早嚴於思慮未起之先。豈無見於存省相資。而爲是居敬之  
皇皇乎。評思慮未起之先。無處用誠。居敬不是誠意事。文此大  
學漸臻之事也。評聖學徹上徹下。無頓漸。文若以頓請者言。則  
身心意知。總一。至善無惡之物而已矣。評此句改得較近。然亦  
如此說不得。故聖賢只曰性善。性以下便不如此說。○開講四  
語。本於傳習錄。其宗旨只是無善無惡心之體一句。其言曰。無  
善無惡心之體。有善有惡意之動。知善知惡是良知。爲善去惡  
是格物。他日其徒王汝止謂錢德洪曰。此恐未是究竟話頭。心

體是無善無惡。則意知物亦皆是無善無惡。二人請正於天泉橋。陽明曰。我這裏接人。原有此二種利根之人。一悟本體。卽是功夫。其次不免有習心在。且教在意念上用功夫。汝止之說。是我接利根人的。德洪之說。是我爲其次立法的。由其言推之。則所謂知善知惡爲善去惡。亦只是接引中人入門方法。猶未是最上乘。若其正法眼藏。止有無善無惡四字而已。陽明又自言居龍場。恍若有悟。証諸五經四子。無所不合。獨於朱子之說。有相牴牾。今試取其言考之五經四子。合乎不合乎。合其說者。五經四子之中。止一告子而已。堯曰危微精一。孔子曰繼善成性。孟子曰性善。與其言不合明矣。牴牾豈獨朱子乎。然則其所謂証諸五經四子而無不合。乃其欺天罔人以瞞瞽後世之術耳。豈誠然乎。若以本體爲無善無惡。必將並去其善而後可以復

本體也。則凡所謂擇善固執樂善不倦者。不幾皆本體之障乎。此正聖學與異端分界之處。此處一差。以下都無是處。不可以不辨也。此文結處改云。身心意知皆至善無惡之物。可謂知其說之非而救之似矣。然有此理。無此事。自天命以後。道理本該如此。所謂有此理也。然堯舜相傳也。說个人心道心。人心曰危。道心曰微。可見心便說有善無惡不得。故雖聖人亦必戒慎恐懼。兢兢以精一允執為主。聖學但分安勉無頓漸。頓漸者。異端了悟之說。爲禪相律教之分。卽陽明利根習心之別。若聖學有頓漸。則堯舜必是頓詣矣。何復云人心道心乎。豈堯之接舜。反不如陽明之接利根乎。

心兼動靜言。

離意看卽意看。而後正心之義乃圓。

羅萬藻文得道未易得心固已難矣。蓋此是和尚話。卽雪嶠謂了悟易得道難。正所謂支離耳。聖學得則俱得。何分難易。蓋正心已無事。蓋說不得無事。蓋意者所求乎心之物云云。蓋支離打成兩橛。心本無不正。緣意之不誠。習熟而本體亦有病。故正心傳謂有所忿懣恐懼好樂憂患。則不得其正。心體上安有此四者之病。可知從意之習熟生來。故欲正先誠。心指渾全之體。意指其零星發動之端。猶中庸之未發已發而有中和之名。其實原非二物。今云意求心之物。不使心聽於意。將使意效於心。不使意自爲意。而常令扶本物以同居。則截然兩物矣。

陳龍川文帝王之正大。不若匹夫之真篤。蓋帝王匹夫豈分誠否者。彼見漢唐以後。帝王無非詐力者。遂以爲必無誠理矣。又人主之道。權謀術數。其借以求濟者。難盡廢也。蓋權謀術數。豈可



云道哉。只此陋見橫踞胸中。道理必不入矣。**文**制其心意。可不  
起。空其心。意無不善。此皆至精之道。而聖人不爲者。以有爲之  
業。皆發於其意耳。**語**告子達摩來矣。豈有道之至精。而聖人不  
爲者。可見其以至精歸異端。而以世務權用之。粗者歸聖道。得  
不謂之悖哉。**文**固知帝王之學。與山林寂寞者異矣。**語**聖學並  
不異。○其所見道之粗。則功利作用。其精者。則空寂不動。而精  
者。又不可用入經世。以奉二氏而慕之。只得以粗者自居。而又  
粉飾以內外異用之術。蓋自白沙陽明以後之講學。未有不由  
此者也。以此而談儒者之經。何心何意。何正何誠。不若一棒一  
喝之爲直截了當耳。

**論有光**意也者。心之所發也。方其未發之時。所以爲善爲惡者。  
泯而未形。此固無所庸吾力。**語**自有正心工夫。卽中庸之致中。

者在。**文**迨夫既發之後。因事而見。而所以爲善爲惡者。則形而  
既著。雖欲謹之而無及矣。**評**此亦誠意中事。非誠意後也。**文**惟  
夫事物方交之際。念慮初萌之時。**評**此却是獨之義。**文**於事則  
無形。而於心則已發。斯謂之意。**評**此固是意然。只得意之初發  
時。乃所謂獨也。**文**於此而不知所以慎之。則天理之微。無以迎  
導其善機。人欲之危。無以抑遏其厲階。**評**只揭得慎獨意。不是  
誠意。全義意。直到治平都是。且誠意是用力。不是尊機。誠意中  
亦無遏抑義。只盡其惡惡之量耳。

**陳際泰** **文**心之不可恃者。謂其心之半者已得。心之全者又未必  
得也。合心與意而後全其所爲心。**評**講誠正先後大意。不確。誤  
以心猶得半。合意乃全。不知心無全半。意亦無全半。意妄則心  
亦妄。意慊則心亦慊。無各半而互全之理。看正心傳有所忿懣

四者。可見心體上有病。皆由發用處做成。故欲正先誠。

**又陳文**意之所起。知之所起也。意與知異名而同所也。此臨時所發之知。傳意者也。意之所開。知之所開也。意與知異名而異所也。此平日所濬之知。導意者也。**評**究竟只此一知。時分先後耳。**文**物之應交與不應交。意能權之。而權者又未必是也。則所爲裁物之知。不可不預也。**評**能權之便是知。致知亦不過能權之耳。**又**孩笑之童。其忠烈之行。或乘乎意之所如。而自聖賢論之。仍然意之所如也。則學問之未深也。**評**故良知但指其自然固有。不可以之爲學道究竟也。**楊維斗**誠字中不可兼言善惡。只有半善而非全善。或九分皆善而一分未盡善。亦是皆要致知。致字極重。**評**誠有半善非全善。九分善而一分未盡善。此亦是致知甲裏話。非誠字中話也。或曰十分九分之說。本朱子曰。

朱子是講自欺。謂爲善之意有不足。非指意之善惡也。

誠必先致。只恐誠其所不當誠。而於當誠者。反不知用誠耳。非謂以知照意之誠不誠而把捉之也。

誠意先致知。不是要知覺察意也。平日講究得道理明白。則發念自然真實。真實來亦不錯。若發意時加省察。此又是慎獨。不是致知條下事。今人皆爲認差此義。故講慎獨又混入致知。只坐將致知工夫。誤作發動時覺察觀耳。

誠意必先致知。非謂發念之時。要知去監制他。亦非謂初發之意必善。繼起之意必不善。而以初念爲知也。致知是平日間事。平日講究得義理善惡分明。到發念時自然當理。若不曾致知。則好所不當好。惡所不當惡。初念便不是。雖誠亦錯。故不可不先致也。若意之既發。其誠與不誠。又當於發動之幾。自加省察。勿

使虛偽閒雜乃所謂慎獨。獨卽意之實境。慎卽誠之緊嚴處。卽在誠意中說。不涉致知甲裏事。若混此處爲致知。則知之功反在意後。且須於致知誠意之間。增補慎獨爲一條目矣。

誠意先致知。不是要知來監察那意之善惡。只是日常間道理明白得盡。到發念時。自然該好者好。該惡者惡。發來不錯耳。人多誤解。致知是發意時返照之用。於是將誠意傳中慎獨打混。以獨爲本體。有謂卽是致知者。有謂真知卽誠意者。甚有謂意乃心之所存。卽是獨體者。其謬亂皆從此出。大凡妄生邪說。只是本文不曾明白耳。此亦誠意必先致知之一證也。

**楊以任**文意之生也。雖小人不能無疑。決其所疑。而意中之小人絕矣。意之生也。雖君子不能遽信。明其所信。而意中之君子成矣。**臣**此又說在意後矣。凡人意之所發。必從熟處生。卽夢寐病

狂醉亂時皆可驗。熟處乃其所明也。故欲誠意必先致知。謂平素於道理講究得明白。則意發必當。乃可得而誠耳。若謂知能覺照。意使不爲惡。能辨決意之疑信。則知在意後用力矣。致知是意未發時工夫。到意發後加審幾省察。乃誠意中之慎獨。非先致之知也。

**黃淳耀**文意動而不能自知。雖欲誠之。其道無由。**評**知不主意動時。文人惟一心。而意與知胥托焉。分者所以示此心從入之處。合者所以求此心歸併之途。**評**八條目總是示從入處。未說歸併。文意之舍外宗內也久矣。蕩而不還。則以心之所無者爲意。**評**先說壞意字。私欲不名意。文意之引外傷內也久矣。紛而善變。則意後更無一知以照之。**評**有慎獨工夫。但不是致知中事。文古人謂防意者必先於知。**評**只說誠不說防。防字便錯。大有

病害。又知則一焉而已。評知亦不一。知至乃一。又惟百千萬端之意。歸於一則誠。不歸於一則不誠。評誠字不是歸一。故朱子於臨卒三日前。改註中一於善三字。正恐後來誤認也。又以知觀意則甚順。以意觀知則甚逆。評多出觀字。弊病不小。此佛氏之覺照也。又雖不遷不貳之人。不無念起而後覺者。評須知有博約工夫在。又在大徹大悟之後。庸有息念而不生者。評禪學之知。正要絕去意字。此與聖學之知正相悖。所謂無生忍也。○誠意必先致知。卽中庸所謂不明乎善不誠乎身。明則誠矣之意。蓋理明則發念皆正。而用力皆實。非謂賴知去覺察意之誠否也。若以覺察爲知。則知反在意後矣。覺察意是慎獨事。不是致知事。此界不明。粗則支離紛擾。精則打入禪門。總與聖經沒交涉。

知與意關。是逐節推去。其寔知是一大截實貫到底。不單粘意也。致知上無先字。故此句急接。不下欲字耳。時文便要做出無欲字之義。非也。

**文南** **文**誠意在致知矣。乃致知則何在。**語**可知在亦先也。知與物。致與格。是拆不開事。故不言先而言在。看下節云。物格而后知至。則層次未嘗不明。

**歸** **文**人之知。具於心。而天下之理。亦非有外焉者也。外之物格。而卽內之知致矣。**語**只舍外。便蔽內。不是兩事。伯安不徹斯義。主張陸學。疑誤後生。惜不讀此數言耳。**文**事物之理。合於吾心之理。**語**說合卽成兩件矣。事物之理。卽吾心之理。何煩合也。或問程子觀物察已者。豈因見物而反求諸已乎。曰。不必然也。物我一理。纔明彼。卽曉此。此亦落或人見解。



若說借物理以反求已知。卽成假合。卽是義外。要之本無二理。明彼卽曉此。更無內外精粗之別。知此則在字自然精寔。

又南齊書學者果有所得於本原之地。則雖賸博之事。可以遊行而無碍。謬甚如此。則格物當爲八條目之末務。卽近來先一貫而後學識之胡說。又知之將借物以廣之。說成兩開。何在之有。且如此則格物又在致知之末矣。

又人於萬物雖處一。評物猶事也。不單指人物之物。

又外緣無窮之象。而內識自然之心。良知自此以不蔽也。評此知字與良知無涉。孟子良知良字。不過指不必學慮而自然可見。以明仁義爲人心之同。猶其言乍見孺子入井可以觀仁。非以乍見爲仁之至。以不慮爲知之極也。若知至之知。則知性知天而心無不盡之謂。與良知之義不同。良知正以不致見。

其良致知正以不恃其良爲致三字牽合不攏牽合則其義各失。夫言豈一端各有所當也。自陽明牽合此三字爲宗旨。彼自指其所爲知。既非曾子格致之知。亦并非孟子仁義之知。不過借儒家言語說法耳。豈可以此解曾孟之道哉。震川講格致處。畢竟爲彼說所惑亂。故多不的切。如云外緣無窮之象。內識自然之心。都似是而非。聖賢所謂格至。只是事物之理。講求體會。到貫通徹盡處。便是格至。不分內外。若謂緣解外物以求識內心。正是分內外。聖賢只要明理以行道耳。要識心則甚。識自然之心。尤屬邪異之旨。如此說。則外緣無窮之象一句。已早喫陽明痛棒了也。既見得萬象屬外。要內識自然之心。又要緣象以識。那得不喫他痛棒。

以致知爲下手。而復以良知爲本體。夾雜考亭與王伯安爲調和。

之說。此一種謬見極多。不知格物者致之功。知至乃復知之體。孟子所謂盡心是也。若良知。不過指其自然發見。如乍見孺子之仁之類耳。以此驗固有之端則可。不可卽以此爲全體也。如以此爲全體。便離去理字。無理則無用。

異端之知。所以與川處不合。善知識老講師作爲定顛倒。只是不循理。反要去理障。

格物一言。千古之聖學也。司馬氏訓爲扞禦外物。而象山宗之。程子訓爲窮盡物理。而朱子宗之。此又朱陸異同之本也。程朱吾不敢議。已。道理是公物。程朱果有可議。何必不敢。竊觀蒙之象。詞曰。蒙以養正。聖功也。此非大學之道歟。非也。上九之爻。詞曰。擊蒙利禦寇。此非扞禦外物之謂歟。尤非也。使非扞禦外物。清明其質。則雖欲窮盡物理。又安知其

不謬也。誠意正心修身。皆所以捍禦外物也。正爲不曾窮理。則必有非所捍禦而捍禦者。如陸王之說。以窮究事物義理爲務外。而必欲去之是也。有所當捍禦而不捍禦。且以爲主者。如陸王之反。以禪爲宗是也。有自以爲已捍禦而實非捍禦者。如陸王之自以爲立大體致良知矣。而所爲所誨。皆猖狂傲慢。日驚於功利權詐是也。凡諸謬害。皆從不窮理而空致知來。故必先窮理。然後能清明其質。而捍禦不謬耳。若既能捍禦外物。而清明其質。則誠正之功已得矣。又何須再講致知乎。至蒙卦象辭。主小學言。不足盡大學之道。上九爻辭。原戒治蒙者。但克治其外誘。不可攻伐太過。反爲之害耳。與格物致知意毫無交涉。如此說經。真可謂之支離穿鑿矣。

物格而后知至節

第四節第五節從第三節生出第五節是知所後則近道也故首句與下六句分終始大次序而終始中又有小次序上四句與下三句分本末大次序而本末中又有小次序皆爲學者指陳大段使之知此近道

作此節似上節之效驗者非也先後總是工夫次第有上一層纔可做下一層無下一層亦不見上一層要做下一層正須有上一層如此看來節節自有本分步步自有交關註中旣字可得而字語脈朗然也

此節而后字與知止節而后之義不同知止節一知止便直貫到能得此節而后却逐層各有境界遞下人每混看與知止節一樣便是一物格便了七箇而后只作急口疊文其爲謬不在文法而在義理矣

而后不是大事了畢。

此是所後之序。而根原却從所先生來。

逐箇而后各有工夫。不是一知至便了。註中可得而三字。正而后

真精神也。

**金**世壽。物與知無漸次而有漸次者也。無漸次故考功可以不  
言先無漸次而有漸次。故責效不可以不言后。**註**第一箇而后  
向來混過。此文疏解的當。與上在字互相發明。

物皆有至善。物格則知所止矣。知止於至善則知至矣。卽格爲至。  
此一箇而后。比下六箇而后較輕。

知至是一大節候。

**羅**萬藻。又知而不憑於物。雖知有所至。皆妄也。**註**卽安得有至。  
知之未至。則不當好而好。不當惡而惡。其意不可得而誠也。此是

知意相關之故。若真誠飾誠。乃是第六章傳意。專釋誠意。故云。非知意相連處要指也。因致知亡傳。此理少發明耳。

此兩節先後言其次第如此。其實工夫節節緊要。無一了百了事也。知至而意不誠。則知爲虛知。其至否亦難見。意誠而心未正。只得零星收拾。東沒西出。弊病百出。亦不見誠之妙也。心正而身未修。則動容周旋中禮。可知有多少病在其根心之妙。亦未充也。

明本而新末。故齊治平三傳皆根修身說。然修身止連家而不連國與天下。又有道理。齊家新之始。治平新之極。故治平二傳皆指家之感應說。看平天下章上老老三句。與民之父母節及孟子獻子二節自見。然齊家止連國而不連天下。又有道理。國與天下。疆界有限。而本末終始亦自分。

七而后終始之義已明。不須更說。但七句挨次平列。本末之義未透。故下節提出修身爲本。

自天子以至於庶人節

上八條目。明新並列。第六節特結出總要。謂明德爲新民之本。自天子以至於庶人。盡天下人類而言。看自以至於四字。天子庶人中間大有人在。不單講兩頭人也。壹是皆以修身爲本。謂各有分限。責任皆從身起化。正謂末異而本同耳。若謂庶人亦以天下爲己任。則同末非同本矣。修身各人當下之事。修身爲本。各人當下皆有己物感應。不待異日及天下而後見其本。亦非爲天下國家之故而後修身也。

天子之本。對天下言。庶人之本。對家言。

庶人齊家亦是新民。



上兩節止就大人身上一氣說。此節又推廣言之。謂不獨天子。卽至庶人。亦有齊家之責。便分明新。分明新。卽有本末。故皆有修身之責。仍責重大人者失之。

**陸文黻**文身有貴賤之殊。而修無偏全之理。**評**括盡**文**身非一人之身。本非一人之本也。**評**此是了義。無一人無此身。則無一人無此責重。但舉其全。須從天子說下耳。故曰。豈是皆以猶萬物一太極。物各一太極也。不是責重大子。

明明德是成己。新民是成物。成己所以成物。故明明德爲新民之本。世無有己而無物之人。則亦無但明明德而不新民之人。此因上文從明明德於天下者立說。故提出此義。正見天子諸侯大夫士庶人。無一人不有此責任。不端爲有天下者言也。時文每歸重天子。似以至於庶人。皆賴天子之修身爲本。失其意矣。

須見自以至於壹是皆以八箇字。字字著是有力。

天子庶人。其本各修。而自以至於四字。却是這中間人類多。止說兩頭。或且責重天子。皆夢呓也。

原從自天子說起。却不是責重天子。內王畿外天下。中間許多色目。自以至於不是虛字。人止做得天子庶人兩頭盡處。不知中間正大有人在。

本字對新民而言。卽庶人至未有室家者。亦必有所與之人所及之物。一人一物。皆末也。身其本也。所以對付此人物者。卽新民也。修身其本也。如此方見人人有新民之事。人人必以明德爲本。故無一人可以不修身者。若必以治國平天下對本字言道。理雖濶大。然有可自委於本外者矣。

自天子以至於庶人。有許多等級。其職業正各不同。然所以不同。

者分也。非理也。故曰分殊理一。此節語勢側重庶人邊。見得雖至庶人也。只是此本。未嘗有別件。庶人無治國平天下之分。然到得修身。則治國平天下之理已具。只看他明明德力量如何耳。其本盛大。則其末濶遠。其本淺薄。則其末狹小。直到大德必受命。匹夫有天下。憑修身者各自做去。固不容越分妄觀。亦未嘗禁人自致也。後世自上及下。總不以修身爲本。遂將此理看得詫異耳。

齊家卽新民也。故庶人與天子同本。中間有國有采地治邑者。不消說矣。時文竟責重有位之人。便不是。豈是皆以四字道理。蓋從位說下。故云自天子以至於庶人。論理其實自庶人。以至於天子。天子新民。亦須從庶人齊家道理做起也。故下文治亂結以所厚。正爲齊家是末治大同處。

本字對家國天下說不可對物知心意說時文並提以出本字最爲無理。

就上文八條目中開抽出修身爲本。故時文每將上下七條目比擬。因以格致誠正對齊治平夾說者。此非理也。本字對家國天下。物知心意乃修身內事。不可與家國天下對股說。

**金鑑** 學之大以知止大也。學之止以知本止也。**語**說本李見羅李見羅提唱此節爲宗。似於諸異說中較切近矣。及細考其說。固仍不離平陽儒陰釋之術也。以知本牽合知止。因提止修二字作話頭。蓋止其所止。非止於至善之止。修其所修。亦非格致誠正之修也。

### 末節

於薄者厚。未爲不可。未嘗無有。但如此必須於厚者厚極耳。使於

所厚者略不甚厚。薄者便厚不成。况彼既於厚者反薄乎。